

Parochians denter tradiziun e moderna

Dies academicus alla Scola aulta da teologia a Cuera

DA CLAUDIO WILLI / MC

■ **Il plaid festiv all'ocasiun dil Dies academicus dalla Scola aulta da teologia a Cuera ha tenui il scienziat social Franz Xaver Kaufmann, ina capacitat che ha dociu biars onns en Germania.** Franz Xaver Kaufmann ei naschiu 1932 a Turitg, ha frequentau la scola claustrala a Mustér, avon che cuntinuar ses studis per daventar duront decennis ina dallas pli reconuschidas capacitads en sia sparta che ha publicau contribuziuns directivas davart la sociologia da religiun.

Ina remarca en parentesa: Siu frar pli vegl, igl gesuit Ludwig Kaufmann (1918-1991) ei enconuschents a biars sco redatur dalla periodica «Orientierung», ina noziun che ha contonschiu siu punct culminont suenter il Secund concil vatican e che ha calau da cumparer 2009 en connex culla erosiun dallas speronzas da lezza gada.

La Baselia sto «dismetter ballast»

Sut il tetel pretensius «Glaubensinn des Volkes – Leerformel oder Wirklichkeit» ha il referent buca mo imponiu il publicum cun sia «profunda aulta sgulada intellectuala», anzi, era pretendiu dabia da siu auditori. El plaid sco scienziat e buca sco teolog e giudicheschi sco sociolog la Baselia «dado anen». Siu viadi atras la historia dalla Baselia ha scuvretg interessantas perspectivas e svelau interessants connex. Suenter igl emprem millenni seigi la direcziun dalla Baselia sefocusada adina dapli sin il papat, quei che seigi la finala vegniu cementau a moda assoluta egl emprem concil Vatican. Il Secund concil Vatican hagi la finala puppei curri-giu quella posiziun centralistica e seigi s'aviarts pil dialog cul «pivel da Diu» ed



Professor Franz-Xaver Kaufmann al Dies academicus dalla Scola aulta da teologia a Cuera.

FOTO Y. BÜRKL

aschia concediu a quel siu plaz enteifer la schientscha ecclesiastica.

Il «caracter monolitico» dils papas cul num Pius piardi tec a tec sia credibilitad e seigi lundervi da vegnir superaus. Pretensius democraticas sco «egualitad e participaziun» semanifesteschi oz adina dapli sco cunterpreisa alla curia, la Baselia seigi dependenta dil «mussar ed emprendre». La discrepanza denter «tradizionalists» e «liberals» pretendi in agir cunscient dalla responsabladad: Sil sectur dalla ecumena spera ins sin capientscha vicendeiv-

la, la secularisaziun progressonta resti ina sfida e prest vegni era la confruntaziun cun religiuns mundialas sco igl islam ad esser ina tala sfida. Per saver subsister en in context talmein vast stoppi la Baselia «sedeliberar dil ballast». Ei setracti da «far uorden culs dogmas». In grond diember da quellas posiziuns dogmaticas sappien bein vegnir capidas ord il context da lur temps, sappien oz denton vegnir eliminadas. Enstagl d'accentuar la hierarchia stoppi la Baselia esser habla da comunicar cul pivel da Diu sil medem nivel. Ei

mondi per il consens dalla cardientscha sco era per in consens dils cartents. Mo sche quei vegni risguardau hagi la Baselia era ina schanza da vegnir prida serius egl avegnir.

«Prender serius las experienzas dalla gliueud»

All'avertura dil Dies academicus ha il rector Christian Cebulj beneventau ils hosps, denter quels era ils uestgs Vitus Huonder ed Amédée Grab, representants dallas baselgias statalas, dils cantuns digl uestgiu,

professers e students e numerus hosps. In liung applaus ha ei dau cu Cebulj ha engraziu a sia antecessura Eva-Maria Faber per siu engaschament exemplaric sco rector. En sia introducziun ha il rector accentuau menziunond la sinoda dils uestgs a Ruma – che la teologia prenda tuttavia serius las experienzas dils humans. Quei seigi ton legreviel sco necessari, pertgei ei drovi in «maletg nunnobilisau silla realtad dalla Baselia», pertgei senza la «capacitad dalla midada» rumpi scadin ligiom social, aschia ch'il tema dil referat ei staus introducius.

L'impressiunonta fiasta d'avertura ei vegnida embellida da Julian Zeller (fagot) e da Nikita Gasser (clavazin). En siu plaid finala ha il cancellier superiur dalla Scola aulta da teologia, uestg Vitus Huonder, engraziu al referent, citond siu profet preferiu Amos, appellond alla Scola aulta da teologia da prestar ina contribuziun persistenta per la derasaziun dalla cardientscha. Igl apert suandont ha purschiu als hosps sco era alla cuminonza dalla Scola aulta da teologia la pusseviltad da sentupada e brat da meinis. Quella pusseviltad ei vegnida nezegiada abundontamein.

Il Premi da matura 2015

A l'ocasiun dil Dies academicus ei era il Premi da maturitad da Cuera puspei vegnius surdaus. Premiadas ein la finala vegnidadas treis dallas lavurs inoltradas, duas ord il cantun da S. Gagl ed ina ord il Grischun. Igl emprem premi ei vegniu surdaus a Shana Graf dalla Scola cantunala da Heerbrugg, il secund premi a Lea Winterhalter da Morschwil. La novella historica davart la Clastra da Königfelden el temps dalla reformaziun scretta da Lea Gafners ei gia vegnida edida en fuorma da cudisch sut il tetel «Die Nonne tanz» el-la Casa editura Cosmos.

Il Club Helvétique s'engascha per la concordanza

■ **Cuss. fed. Eveline Widmer-Schlumpf è sa retratga dal cussegl federal, il qual vegn elegi il proxim 9 da december. En lez connex evokesch'ins la «concordanza confederala» per giustifigar l'attribuziun d'ina segunda sedia a la pps. Ma tge munta vairamain «concordanza»?** Lezza fa part da l'identitad politica republican creschida durant l'istorgia da la Svizra. Ella è ina cumpetenzza ch'il pivel svizzer ha acquistà successivamain, ina conquista che ha stimulà e stimulescha vinavant la coesiun ed il svilup da la Confederaziun. Nagin na metta quai en dumonda. Ma lunsch enturn pari ch'ins haja emblidà co ch'ins duaja enleger vairamain la concordanza e co ch'ins l'enlegeva propi il 2007, cur ch'ins n'ha betg reelegi in cussegl federal.

En la cultura da concordanza reglesch'ins conflicts a moda concilianza, perquai che l'adversari politic vala sco represchentant legitim d'arguments e d'interess differents. La concordanza sa fida da proceduras che pretendan ed effectueschan ch'ins enconuschia bain tut las posiziuns. En ina democrazia da concordanza cumbatt'ins per ils megliers arguments, per raschunavlezza. Ina democrazia cumpetitiva percunter chaschuna ina politica emozionala da simbols ed ina pura politica da pussanza. La regenza federala e quellas da chantuns e vischnancas vivan il principi da collegialitad; en ils parlaments promov'ins la cooperaziun da las differentas forzas.

La PPS appellescha adina a la tradiziun svizra, ma volva adina puspe il dies a la tradiziun da concordanza – e

sincerescha il cuntrari. Ella ha pli gugent schliaziuns «puras». Cunter quai ha l'Aassemblea federala mess in clar accent avant otag onns. Sche la pps vul surpigliar responsabladad suenter ses success tar las davosas elezziuns, e sch'ella pretenda ina concordanza aifer il cussegl federal, sto'la esser cunscienta da quai ch'ina veritabla concordanza munta. I na dependa betg mo da l'aritmetica. Tschellas partidas e l'assemblea federala ston regurdar la pps e ses candidats al cussegl federal ch'ina veritabla concordanza cumpiglia l'abilitad da far cumpromiss tar las persunas che decidan.

Quai munta era che la pps, sco la partida la pli ferma, ma senza maiortad assoluta, na po betg determinar sezza tgi che la represchenta en la regenza: la PPS sto surlaschar lezza tscherna a l'assemblea federala. Ella sa referescha adina a la democrazia; ella sto pia respectar e renunziar a ses «artitgel Widmer-Schlumpf» anti-constituzional, il qual stipulescha ch'ina persuna elegida en il cussegl federal senza vegnir proponida da sia fracziun duaja vegnir sclausa da la partida sch'ella na renunzia betg a l'elecziun.

Da considerer tut spezialmain è che la concordanza na garantescha betg mo il success dal cussegl federal. Ella renda las decisziuns politicas pli previsiblas e pli impegnativas e segirescha la pasch sociala. Quai sun las premissas da noss success economic. La concordanza è in trumf da la Svizra; gist en temp grev na dastg'ins betg metter en dumonda ella.

Il Club Helvétique

Lectura en rumantsch grischun

Ina nova publicaziun da la Chasa editura rumantscha

■ **(mc) Als Dis da litteratura da questa fin d'emna a Domat vegn era preschentà in cudesch da lectura per rumantsch grischun.** Quatter scriventas e scrivents da tutas generaziuns e regiuns han contribui cun texts tar divers temas a quest cudesch che furma cun ils fotograms in artg plain sentiment, variaziun e tensiun.


Ina cumparsa speziala

Quest cudesch cun dies liber cumpara sco rimnada da carnets. Ils fascichels cun ina cuverta colorada èn deditads mintgamai ad in tema: viadis, regurdientschas, nova vita, tats e tattas, relaziuns, destin, temp, muments – temas che ans occupan mintga di, las auturas ed ils auters han però tscherni libramain lur tema. Ils texts per part fitg personals èn vegnids scrits en rumantsch grischun. Mintga fascichel ha in'otra color e vegn accumpagnà d'illustraziuns en furma da fotograms.

Quei che dura, bain madira

Il project d'in «cudesch da leger cun agid» en rumantsch grischun è vegnir preschentà gia l'onn 2002 a chaschun dal vegnavel anniversari dal rumantsch grischun. Anita Simeon e Theres Jörger han vuli far insatge ludic e captivant per la generaziun ch'era anc betg vegnida cunfruntada cun il rumantsch grischun en il temps da scola tenor il motto: «Quai na chapesch jau betg» – quai da natti betg». Previs era ina publicaziun cun in curs da crash grammatical ed ortografic.

Oz è la situaziun da rumantsch grischun in'otra. Meds da rumantsch grischun datti per mintga sort da diever, uschea è l'idea dal project original vegni-



Frontispezi dal nov cudesch da lectura.

FOTO O. ITEM

da adattada. Sin bunamain mintga pagina dal cudesch «mintga di» datti plects che vegnan preschentads en tut ils idioms ed en tudestg. Plects ch'èn u relevants per chapir l'istorgia u plects ch'èn propi fitg differents d'in idiom a l'auter. L'expressiun tudestga è agiuntada perquai che la Quarta Lingua è daventada partenaria da quest project e basegna mintga carnet singul per ses commembers novs da l'uniun.

Scriventas e scrivents

Las inizianas èn Anita Simeon e Theres Jörger, ellas han furni l'idea fundamentala. Ensem cun la Chasa editura rumantscha e La Quarta Lingua è il concept vegni adattà e realisà. Cooperà cun agens texts han: Maria Cadruvi, Silvio

Camenisch, Rita Cathomas-Bearth, Aita Dermont-Stupan, Dominique Dosch, Flavia Hobi, Fadrina Hofmann, Chatrina Josty, Myriam Pelican-Camenisch, Viola Pfeiffer, Tinetta Rauch, Eve Riedi Collen, Claudio Spescha e David Spimmler.

Al cumenzament dal cudesch pon ins consultar las biografias da las singulas auturas e dals singuls auturs.

Vernissascha dal cudesch

La venissascha da quest cudesch «mintga di» ha lieu sonda, ils 7 da november 2015, a las 11.00, en il rom dals Dis da litteratura a Domat.

Il cudesch po vegnir retratgs en las librerias e sut www.chasaeditura.ch, el ha 128 paginas, cuntegn texts da 14 scriventas e scrivents, è illustrà e custa 24 francs.